

**IJAMBO RYA NYAKUBAHWA MADAME Jeannette KAGAME,
MU MUHANGO WO GUHEMBA INKUBITO Z'ICYEZA NA BA
MALAYIKA MURINZI**

Karongi, ku wa 7 Gicurasi 2010

Ba Nyakubahwa ba Ministres,
Nyakubahwa Guverineri w'Intara y'Iburengerazuba
Bwana Mayor w'Akarere ka Karongi
UN FAMILY Representative,
Bwana Muyobozi wa RDB/ICT,
CISCO Representative
Barezi, Bana bacu, Ba Malayika Murinzi, mwaramutseho?

Uyu muni duteraniye hano twizihiza ibirori by'impurirane, byo gutanga ibihembo ku bana b'abakobwa batsinze neza. Twifuje kandi kubihuza no gutanga inka kubo twita ba “**Malayika Murinzi**”, bakomoka mu turere twa Karongi, Rutsiro, Ngororero, Ruhango na Muhanga.

Igikorwa cyo guhamba abakobwa batsinze neza, kibaye ku nshuro ya gatandatu, kandi nk'uko bisanzwe gifite insanganyamatsiko igira iti: « **Ba inkubito y'icyeza n'ishema ry'abakobwa** ». Muri iki gihe cyose tumaze, dushyira imbere intego z'ingenzi 3 arizo:

- Gushishikariza abakobwa kugana ishuri,
- Gukomeza amashuri mu byiciro byose bishoboka,
- Gutsinda neza no kuba indashyikirwa!

Dufatanije n'izindi nzego, twakwishimira ko nibura intego ya mbere yo gushishikariza imiryango gushyira abana bose mu ishuri, baba abakobwa cyangwa abahungu yagezweho.

Intego yo gukomeza amashuri mu byiciro byose bishoboka ntabwo irabasha kugerwaho neza, ukurikije imibare igaragazwa n'Ikigo cy'igihugu gishinzwe ibizamini.

Mu mashuri abanza, abana b'abakobwa bagera nibura mu mwaka wa gatandatu¹ ariko siko bose babasha gukora ikizamini gisoza ayo mashuri². Ababashije gukora ikizamini nabo siko babasha gutsinda ngo babone amanota meza³. Abo bakobwa bose bagenda basigara batabasha no kurangiza icyiciro cy'amashuri abanza bajya he? Biterwa n'iki? Bimwe muri byo byavuzwe kandi bimwe twabifatiye n'ingamba, hasigaye kubishyira mu bikorwa.

Iyo urebye imibare igaragazwa, abakobwa bagera mu cyiciro rusange n'icyiciro gisoza amashuri yisumbuye, ariko nanone benshi ntibabashe gukomeza.

Abo bakobwa bagenda babura batabasha gukomeza amashuri nibo babyeyi b'ejo. Biragoye rero kugira ngo bazafashe abana bazabyara gutera imbere. Birasaba kongera gushyiramo ingufu mu nzego zose.

Bana b'abakobwa muri hano, namwe mugomba kugira uruhare mu kwiga kwanyu. Ni nayo mpamvu dukora izi gahunda ngo bibatere ingufu. Kandi dukomeze no gukangurira inzego zose kubafasha kugera ku iterambere.

¹ Mu 2009, abakobwa 89 757 n'abahungu 77 999 nibo bari bageze mu mwaka wa gatandatu w'amashuri abanza(RNEC,2009)

² Abakobwa 84 969 bangana na 53.9% (Abakobwa bagera ku 4788 bari barageze mu mwaka wa gatandatu, ntibakoze ibizamini) n'abahungu 72 789 (46.1%) bakoze ikizamini gisoza amashuri abanza

³ Abakobwa 54 434(50.8%) nibo bonyine babashije kugeza ku manota yagendeweho (Abakobwa 30 535 baratsinzwe)

Ku bijyanye n'intego ya gatatu yo gutsinda neza no kuba indashyikirwa, nayo turacyari kure.

Nk'uko babibabwiye, ubundi duteganya guhamba umukobwa umwe muri buri murenge ku barangije amashuri abanza, umwe mu karere ku barangije icyiciro rusange bafite n'ibura 60%, na batatu mu ntara ku barangije amashuri yisumbuye. Uyu mwaka abo twahembye bafite hagati y'amanota 60% na 90.6 mu mashuri abanza

Mu mirenge 416 igize U Rwanda, hari imirenge 257 idafite umwana n'umwe w'umukobwa wagejeje ku manota 60% twahereyeho. Nko mu mirenge 96 igize iyi ntara, habonetse abakobwa 61 baturuka mu mirenge 25 gusa. Twihe umuhigo rero ko, ubutaha nibura buri murenge uzaba ufite inkubito y'icyeza izawuserukira.

Ibi biratwerekako ko tugifite byinshi byo gukora ngo tuzamure amashuri abanza, cyane cyane ayo mu cyaro, kuko tuzi ko amashuri abanza ari fondasiyo y'ibyiciro bindi bikurikira.

Ariko na none igishimishije ni uko muri iyi Ntara, habonetse abakobwa batatu, barangije amashuri yisumbuye, batsinze neza. Ni nabo tumaze guhamba mu kanya, bese bakaba baturuka mu mashuri yisumbuye yo mu Karere ka Rubavu.

Bana muri hano, hari inama nyinshi mwahawe nanjye ndagira ngo nongereho:

Mbere na mbere mwisuzume, mumenye ubuhanga n'ubushobozi mwifitemo, kandi burahari. Nk'uko umuntu agaburira umubiri we ibiwutunga, namwe mugaburire ubwonko bwanyu. Ntimwibande gusa ku bijyanye n'amasomo yo mu ishuri, ahubwo mushishikarire kwihugura muri byinshi. Cyane cyane mugire umuco wo gusoma, mwihugure no mu bundi buhanga.

Indi nama nabagira, buri wese namenye ingufu afite, amenye n'aho yaba afite intege nke, yisunge, amenye no gukorana bagenzi be, ajye inama, anagire ubushake bwo guhinduka no guhindura abandi, kandi birashoboka.

Mugire umuhate kandi mwoye gucibwa intege n'icyo aricyo cyose. Mwirinde ibishuko byose bishobora kubangamira intego mwihaye. Hari abashobora kubashora mu ngeso mbi, zatuma ubuzima bwanyu bwangirika. Hari n'abashobora kubashyiramo ibitekerezo bigamije kwangiza igihugu kibakunda, kandi kibatekereza iteka.

Bana rero mwahembwe uyu munsi, nongeye kubashimira kandi mukomereze aho ndetse muzanaharengere. Nk'uko Fondation Imbutu idahwema kubibatoza, mube "Inkubito y'Icyeyeza n'Ishema ry'Abakobwa", mukomeze mube urumuri aho muri hose.

Ndasaba urubyiruko muri rusange gukomeza gusarura imbuto z'ubumenyi, ubuhanga n'ubupfura, no kuzibiba mu muryango nyarwanda.

Babyeyi namwe muri hano, dufite inshingano zikomeye zo kwita ku bana, baba abakobwa cyangwa se abahungu. Zimwe mu

mbogamizi zavuzwe, ziri mu bibangamira uburenganzira bw'umwana muri rusange.

Buri wese uri hano yibaze ati: “ Ese mu bijyanye no kurinda umwana ihohoterwa n'ikibi icyo ari cyo cyose, nkora iki? Kuba ntaragira icyo nkora, ni uko nta hohoterwa rikorerwa aho ntuye? Cyangwa ni uko numva bitandeba?” Hanyuma dufate icyemezo kuko biroroshye kandi biranashoboka.

Dufite ingero zifatika z'ababyeyi b'Abanyarwanda, bagize umutima wo gukiza no kwita ku bana, mu buryo bwinshi bunyuranye nk'uko mwabyumvise.

Fondation IMBUTO yabise “Malayika Murinzi” kuko barinze abana icyago batitaye ku masano, ku mutungo bafite, cyangwa se ngo banagire inkeke kubera umubare w'abana babo basanganywe. Abo babyeyi ntangarugero, tubaha inka y'ishimwe.

Iki gikorwa ariko ntikigamiye guhamba gusa. Kigamiye gukoresha urugero rw'abaturage nkatwe, abaturanyi bacu, abavandimwe ndetse n'ababyeyi bacu, bagize ubutwari bwo kwita kuri abo bana, kandi bakabitaho nta yindi nyungu bategereje.

Abo ba Malayika Murinzi duturanye, batubera indorerwamo twireberamo. Tukisuzuma, tukareba abana dutunze, n'abandi tuzi birirwa bahohoterwa, maze tukabarinda. Muri aba babyeyi, turabona ko kwita ku mwana wese nk'uwawe bishoboka, kandi bitagombera ubundi bushobozi budasanzwe.

Kuba Malayika Murinzi, si ukurera umwana gusa wabuze ababyeyi, cyangwa se ababyeyi batitayeho. Hari no gushishikariza abandi babyeyi kurwanya ihohoterwa rikorerwa abana, kugira ibikorwa bigaragara bifasha abana kubarinda ikibi icyo ari cyo cyose, n'ibindi...

Uyu mwaka turahemba ba Malayika Murinzi 65 biyongera kuri 90 twahembye mu myaka yashize. Turifuza ko habaho ihuriro ry'abo ba Malayika Murinzi muri buri Karere, mukagira ibikorwa bifatika cyane cyane bigamije gukangurira abandi babyeyi. Mukamenya abana bakiriwe mu miryango uko bafashwe, mugafatanya kugira ngo mubashe gutera imbere. Mugahugurwa ku bijyanye n'uburenganzira bw'abana, mukaba intangarugero muri byose.

Hamwe na hamwe byaratangiye, navuga nko mu Karere ka Musanze aho iryo huriro ryatangijwe na Malayika Murinzi umwe (Paul GATSIRI), ubu rikaba rimaze kugira abandi banyamuryango 32.

Nkunze kubwira Ba Malayika Murinzi duhemba, ko baba bagiranye igihango na Fondation Imbutu. Inka muhabwa si ikimenyetso gusa, ahubwo ni igihango cyuzuyemo imbutu mugomba kubiba mu baturanyi banyu. Turifuza ko mugira umuco wo kwitura no kuziturira abandi ba Malayika Murinzi. Ibyo tukifuza ko byakorerwa nyine muri ayo mahuriro y'akarere.

Sinasoza iri jambo ntashimiye ba Malayika Murinzi aho bari hose, ndavuga umuntu wese ufite umutima wa kibyeyi, umutima

w'impuhwe, umutima w'urukundo, bitabiriye gushyira mu ngiro intego ya campagne "Wite ku mwana wese nk'uwawe".

Bana muteraniye hano, babyeyi, bayobozi, bafatanyabikorwa n'incuti za Fondasiyo IMBUTO, duharanire ko udusozi twose tw'U Rwanda, twakuzuraho Inkubito z'icyeza, Urubyiruko rw'Indashyikirwa n'ababyeyi ba Malayika Murinzi.

Murakoze , mugire umunsi mwiza!